



Clà Riatsch vegn undrà cun il Premi SRG.R 2015.

MAD

Premi SRG.R va a Clà Riatsch

■ (cp) Clà Riatsch, professor per la lingua e cultura rumantscha, vegn undrà cun il premi SRG SSR Svizra Rumantscha (SRG.R) 2016. Uschia ha decis la suprastanza SRG.R. Il premi vegn surdà ad el en reconuschientscha da ses engaschi da blers onns per il mantegniment ed il svilup da la lingua e cultura rumantscha, en spezial per sias activitads sin il champ da la litteratura rumantscha. Clà Riatsch tutga tar ils Rumantschs che vivan ordaifer il Grischun (ca. 30%). A chaschun da sias occurrenz d'instrucziun a l'universitad sensibilisescha e fascinescha el numerus students per las particularitads da la lingua rumantscha. El è bun da preschentar aspects da la scienza litterara a moda eloquenta, fundada e chapaivla. El fa plinavant la punt tranter la litteratura tradiziunala e tendenzas actualas da la societad. Cun ses agir ha el sveglià l'inte-

ress per la lingua e cultura rumantscha en tut la Svizra e sur ils cunfins naziunals.

En reconuschientscha da sia contribuziun extraordinaria al mantegniment ed al svilup da la lingua e cultura rumantscha ha decis la suprastanza SRG.R dad undrar Clà Riatsch cun il premi SRG.R 2016. Il premi vegn surdà ils 21 da matg 2016 en il rom da la radunanza generala da la SRG.R a Cuira.

Clà Riatsch (1956) è creschì si a Ramosch en l'Engiadina Bassa. Suentar la scola chantunala a Cuira ha el studegià litteratura taliana, filologia romana ed istorgia veglia a l'Universitad da Berna. Suentar ch'el ha lavurà insaquants onns sco assistent, promovevcha Clà Riatsch cun ina lavur davart C. E. Gadda. Sco collavuratur scientific al project dal fond naziunal dad *Iso Camartin* (litteratura e lingua minoritara) daventa el il 1989 ses substitut a l'Uni-

versitad da Turitg. El surpiglia incumbensas d'instrucziun e lectorat al seminari talian a Berna e pli tard incumbensas d'instrucziun per la litteratura rumantscha a l'Universitad da Friburg e per la litteratura taliana a l'Universitad da Neuchâtel. L'onn 1997 habilitescha Clà Riatsch en la scienza litterara rumantscha e taliana a l'Universitad da Berna. Oz viva el a Berna e lavura dapi il 2001 a l'Universitad da Turitg sco professor per la linguistica e la scienza litterara rumantscha.

Tenor statutas contribuescha la SRG.R cun sia lavur al mantegniment ed a la promozion da la lingua e cultura rumantscha. Il premi SRG.R vegn surdà dapi l'onn 1960 mintg'onn ad ina personalitad u in'organisaziun per meritis particulars per la lingua e cultura da la Svizra rumantscha. L'onn 2015 ha la chanceliera federala *Corina Casanova* retschet il premi.